

Minister Schwengle ta felicita “Maestro FIDE Jasel Lopez” cu su titulo nobo

ORANJESTAD - Aruba tin algun talento hoben cu ta mustrandó un progreso continuo den e deporte di schaak. Cu esfuersonan coordinada y bon planificacion, e federacion di schaak ta percura pa su miembronan tin un experiencia dibertido y interesante, pa nan haya e entrenamiento adecua y ta ofrece diferente oportunidad pa nan por biala pa torneo internacional.

Recientemente Minister di Salud y Deporte, dr. Alex Schwengle a ricibi bishita di Jasel Lopez, un hoben Arubiano kende ta destacando den e mundo di schaak. Lopez recientemente a wordo reconoci como un di e miho talentonan den Caribe den e deporte di schaak y a wordo presenta cu e titulo codicia di Maestro FIDE na Trinidad & Tobago durante di un torneo. Despues di e titulo di Maestro FIDE ta sigui Maestro Internacional y despues Grand Master; tur e titulonnan den schaak ta wordo otorga pa medio di e federacion internacional di schaak, FIDE.

Un Grand Master ta e categoria di mas halto den schaak mundialmente y ta suma-

mente dificil pa yega na e categoria aki, pero Jasel ta poniendo su metanan y poco poco ta yegando na nan tambe y si e sigui asina, no ta descartar e posibilidad cu un dia lo por wak Jasel su nomber riba e lista di Grand Masters.



Den e deporte di schaak, Jasel Lopez ta un “topsporter”, Minister Schwengle a subraya. E mandatario a expresa su admiracion pa e esfuersonan y entusiasmo di Jasel pa su deporte, añadiendo cu mes cos cu ta e caso cu otro deportenan, e asina yama deporte di pensa aki tambe ta un instrumento cu ta aumenta e funcionamiento di e hoben na

scol y den su círculo familiar. En general, mucha y hobennan cu ta haci deporte ta mehora nan resultadonan na scol y esaki ta conta pa schaak tambe. Minister Schwengle ta di opinion cu e categoria di deporte di pensa mester sigui

haya for di gobierno e mesun sosten cu e deportenan fisico. E titular di deporte, kende conoce e famia di Jasel pa hopi aña caba, a disfruta di un conversacion cu e hoben pa felicita y ta desea hopi éxito cu su desaroyo den su carrera deportivo y su carrera academico.

Jasel su rendimiento y logronan ta hayando atencion



di FIDE; e organisacion ta reconoce como un di e miho talentonan di Caribe y hasta a duna Jasel un “travelgrant”, cu esaki pagando su biahe pe participa na e torneo na Trinidad y Tobago.

Jasela haci e observacion cu e ta sigui train, “haci mi maximo esfuerso” pa e sigui mehora su wegá. E hoben ta pone su metanan cu determinacion pa sigui padilanti y su siguiente competencia ta uno pa cual el a cualifica, esta Nationale Nederlandse Kampioenschap Onder 20.

E tata di Jasel a siña, e y su ruman homber hunga schaak ora cu Jasel apenas tabata tin cinco aña y tur anochi nan tabata sinta hunga; schaak a bira

“algo di famia”. Cu nuebe aña, Jasel a bira miembro di Aruba su club di schaak, unda cu el a sigui crece den e deporte.

Jasel ta cuminsando cu su estudio di Hospitality and Tourism na Maastricht, Hulanda na augustus. E ta splica cu e studionan ta musta cu hendenan cu ta hunga schaak ta score miho na scol den wiskunde, natuurskunde y scheikunde. Esaki ta pasobra e wegá di schaak ta encera uzo di hopi logica y teoria, mescos cu ta e caso di e matematican menciona. Jasel a bisa cu schaak ta un sport cu ta yuda e deportista hopi como persona pero tambe den estudio. □